

*LE CHAPITRE DE L'HISTOIRE,
contenant quatre-vingt huit versets,
escrit à la Meque.*

AV Nom de Dieu clement & misericordieux. Dieu est tres pur, il entend tout, il est tres sage. Ces mysteres sont les mysteres du Livre qui distingue la verité d'auec le mensonge ; le te raconte l'histoire de Moïse & de Pharaon avec verité pour le contentement des vray-croyans. Pharaon estoit puissant en terre, il traitoit ses subiets comme bon luy sembloit, il en tourmentoit vne partie, il esgorgeoit leurs enfans, il mal traittoit leurs femmes, & estoient de ceux qui salissoient la terre ; l'ay donné ma grace à ceux qui estoient affligez en terre, ie les ay fait successeurs du Royaume de Pharaon, ie les ay estably dans les estats, l'ay fait voir à Pharaon, à Haman, & à leur armée ce qu'ils apprehendoient le plus, nous auons dit à la mere de Moïse, alle te ton enfant, si tu crains qu'on luy fasse mal iette-le sur le Nil, n'aye point de peur, & ne t'afflige pas ie te le rendray entre tes bras, & le mettray au nombre des Prophetes. Les domestiques de Pharaon l'ont rencontré sur l'eau & l'ont sauué pour estre vn iour leur ennemy, & pour les tourmenter, parce que Pharaon, Haman & leurs gens estoient infidelles ; La

femme de Pharaon luy a dit; Je te prie de ne pas faire tuer cét enfant, mes yeux se rejoüissent de le voir, il fera vn iour vtile à nostre seruice comme nostre fils; mais ils ne sçauoient pas (ce qui leur en deuoit arriuer;) le cœur de sa mere a esté deliuré d'aprehension lors qu'elle l'a veu entre les mains de la femme de Pharaon, & peu s'en a fallu qu'elle n'ait fait cognoistre qu'elle estoit sa mere, nous luy auons fait prendre pariée, & a crû en nos promesses; Elle a dit à sa sœur de le suiure pas à pas, elle le suiuit de loin sans faire connoistre qu'elle fut sa sœur, ny qu'elle prit garde à luy. Nous auons auparauant deffendu à Moïse de succer le laiët d'autre nourrice que celuy de sa mere, sa sœur a dit aux domestiques de Pharaon; Voulez-vous que ie vous enseigne vne nourrice & des gens qui le nourriront fidellement? Nous l'auons fait rendre à sa mere pour le nourrir, elle a mis fin à sa tristesse quand elle a connu & veu que Dieu est veritable en ce qu'il promet, mais la plus grande partie du peuple ne le connoit pas; Lors que Moïse a esté aagé de trente à trente-trois ans, nous luy auons donné la science & la sagesse, ie recompense ainfi les gens de bien; Moïse entrant vn iour dans la ville, rencontra deux hommes qui se battoient, l'vn estoit des enfans d'Israël, & l'autre estoit Egyptien & de ses ennemis, sur qui il se jetta & le tua, apres ce il dit, le Diable m'a tanté, il est ennemy découuert des hommes, Seigneur ie t'ay offensé, pardonne moy, il luy pardonna, il est cle-

ment & misericordieux ; Seigneur puis que tu m'as fait tant de grace , ie ne donneray iamais ayde ny secours aux infidelles. Il demouroit dans la ville avec crainte, & se tenoit sur ses gardes, le lendemain il a rencontré vne autre fois celuy qu'il auoit deffendu le iour auparauât qui se battoit encore avec vn autre Egyptien, & luy a demâdé secours; Moïse luy dit, tu es vn seditieux, il luy respôdit, ô Moïse me veux tu tuer, comme celuy que tu tuas hier? Veux-tu estre vn tueur de monde ou homme de bien? Peu de temps apres vn hōme accourut à luy de l'extremité de la ville qui luy dit; ô Moïse les ministres de Pharaon ont conspiré contre toy, ils te veulent faire mourir, faue-toy, & suis mon conseil; Il sortit de la ville avec crainte, se tenant sur ses gardes, priant son Seigneur de le deliurer des mains des infidelles, il s'en alla du costé de Madian, & dit, Seigneur ne permets pas que ie suiue vn mauuais chemin; il rencontra vn grand nombre de personnes qui faisoient boire leurs troupeaux; il y trouua deux filles qui ne pouuoient pas abreuer leurs animaux, il leur dit, que faites-vous icy vous deux? Nous n'auons pas la force de tirer de l'eau pour faire boire nos bestes, nous attendons le Berger, nostre pere est trop vieil pour en puiser; Il tira de l'eau du puy pour abreuer leurs troupeaux, & se retira à l'ombre à cause de la chaleur du Soleil, disant, Seigneur, ie suis priué de toutes les graces que tu m'as cy-deuant données, ie suis maintenant pauvre & necessiteux;

vne de ces filles le vint trouuer toute honteufe & luy dit, mon pere t'appelle pour te recōpenfer de la peine que tu as prise d'abreuuer nos animaux; Lors qu'il fut auprès de ce vieillard, il raconta ce qui luy estoit arriué; ce vieillard dit, ne crains rien, ie te deliureray des mains des meschans, Vne de ses filles dit à sa sœur, donne à manger à cet homme, & le recompense de ses peines, il nous a aydé avec affection; leur pere luy dit, ie te veux marier à vne de mes deux filles à condition que tu auras du foin de mes troupeaux l'espace de huiët ans; dix ans si tu veux, dit Moïse, ie ne te quitteray pas, tu me trouueras homme de bien, ie te seruiray les deux termes, ou huiët ou dix ans si tu l'as agreable, Dieu est tesmoin de ce que ie dis; Apres le terme passé, Moïse quitta la maison de son beau pere, se retirant avec sa femme, il vit de loing vn grand feu du costé de la montagne, & dit à sa femme, arrestez-vous icy, ie voids le feu du tout-Puissant, ie reuiendray bien-tost, ie vous en apporteray vne estincelle, peut-estre que vous en serez rechauffée: Lors qu'il a esté auprès de ce feu, on luy a crié du costé droict du valon d'vn lieu esleué & d'vn buisson; O Moïse, ie suis Dieu Seigneur de l'vniuers, jette ton baston en terre; lors qu'il vid mouuoir son baston, comme s'il eust eu vie, il s'infuit de peur, & ne retournoit plus, O Moïse, approche & ne crains rien, tu es en vn lieu de seureté, mets ta main dedans ta pochette, elle en sortira blanche & luisante sans

mal, retire ton bras dedans ta manche elle retournera en son premier estat, ton baston & ta main seront deux signes de ma toute-puissance auprez de Pharaon & de ses ministres qui contreuient à mes commandemens. Moise dit, Seigneur i'ay tué vn Egyptien, i'ay peur qu'ils ne me fassent mourir, commande à Aaron qui est éloquent de venir avec moy pour m'aider, & pour confirmer ce que ie diray; ie crains qu'ils me démentent : le te donneray ton frere pour t'aider, ie vous donneray à tous deux la force de vous garder de leur malice, allez faire ce qui vous est commandé, vous ferez victorieux & tous ceux qui vous suiuront : lorsque Moise a esté auprez de Pharaon, qu'il luy a fait voir mes miracles, & presché mes commandemens à ses Ministres, ils ont dit, cela n'est que magie & enchantement, nous n'auons pas oüy parler de ces choses à nos predecesseurs. Moise dit, le Seigneur connoist celuy qui enseigne le droict chemin & celuy qui doit auoir part dans le Paradis, les infidelles seront tres-malheureux. Pharaon dit à ses ministres, connoissez-vous vn autre Dieu que moy ? O Haman, fais moy faire des sacrifices & bastir vn Temple, m'abuseray-ie au Dieu de Moise ? ie crois qu'il est au nombre des menteurs. Il s'est enorgueillly en terre avec ses ministres, & ont crû qu'ils ne seroient iamais assemblez deuant moy pour estre iugez, nous l'auons surpris avec ses gens, & les auons fait perir dedans la mer, considere quelle est la fin des infidelles, nous les auons abandonnez,

& sont au nombre des condamnés au feu d'Enfer; ils ne trouveront personne qui les protège au jour du Jugement, nous les avons maudits en terre, & seront au jour de la resurrection abominables à tout le monde. Nous avons enseigné nos commandemens à Moïse apres avoir exterminé plusieurs infidèles auparavant sa venue, Nous luy avons donné le livre pour servir de lumière au peuple, le conduire au droit chemin, & acquerir nostre grace, peut-estre qu'ils s'en souviendront. Tu n'estois pas auprez de Moïse quand nous luy avons parlé, nous avons créé vn autre siecle apres luy, tu n'habitois pas en ce temps avec les habitans de Madian, ny tu ne leur enseignois pas nos commandemens, c'est nous qui t'avons enseigné l'histoire des siecles passez, tu n'estois pas sur la montagne lorsque nous avons parlé à Moïse, nous t'avons enuoyé par nostre grace speciale pour prescher au peuple les tourmens de l'Enfer, ils n'ont pas encor eu cy-deuant vn Predicateur semblable à toy, peut-estre qu'ils y penseront, lorsqu'ils ont ressenty quelque punition de leurs pechez; ils ont dit, Seigneur, si tu nous eusse enuoyé vn Apostre pour nous instruire, nous aurions obey à tes commandemens & creu en ta loy; & lorsque la verité leura esté enseignée de nostre part; ils ont dit, Mahomet fait-il des miracles comme Moïse: ne demerent-ils pas ce qu'à fait Moïse lorsqu'ils disent que Mahomet & Moïse sont deux sorciers auerez, & lorsqu'ils ont dit qu'ils ne croyent ny Prophete ny escriture: dis leur, ap-

portez quelque liure de la part de Dieu qui enseigne mieux le droict chemin que l'ancien Testament, & plus salutairement que l'Alcoran, ie le suiuray si vous dites la verité: S'ils ne font pas exaucez lorsqu'ils demanderont ce liure, sçache qu'ils ne suiuent que leurs appetits & leur impieté; qui est plus deuoyé que celui qui ne suit que la passion, & qui n'est pas conduit de Dieu: il ne conduit pas les Infideles; certainement nous leur auons enuoyé l'Alcoran; peut-estre qu'ils croiront en luy, ceux à qui nous auons ci deuant enuoyé ce Liure croient en ce qu'il contient, lors qu'ils l'entendent lire ils disent, nous croyons en ces paroles c'est la verité mesme qui procede de Dieu, nous croyons en l'vnité de sa diuine Maiesté, ils seront doublement recompensez, parce qu'ils ont perseueré à bien faire, ils ont chassé le mal par leurs biens-faicts, & ont despencé en bonnes œures vne partie des biens que nous leur auons donnés; Lors qu'ils ont oüy mal parler de la foy ils se sont retirez, ils ont pris congé de la compagnie, & ont dit, vous respondrez des vos actions, & nous respondrons des nostres. Ne te soucie pas des ignorants, tu ne conuertiras pas tous ceux que tu voudras conuertir, Dieu conuertit & conduit au droict chemin qui bon luy semble, & connoist tous ceux qui le suiuent; ils ont dit, si ie suy le droict chemin avec toy, il me faudra quitter mon pays: Ne les establirais ie pas en lieu de seureté où ils trouueroient toute sorte de fruiets pour les enrichir, mais la plus grande partie du pou-

ple ne le connoist pas; Combien auons nous exterminé de Villes qui se plaisoient dans leur mauuaise vie? Personne ne les a plus habitées, excepté fort peu de gens, & auons esté heritiers de leurs richesses; Dieu ne ruina pas la Meque qu'il n'aye auparauant enuoyé vn Apstre pour enseigner à ses habitans le droict chemin, Dieu ne ruine point de Ville si les habitans ne sont iniustes, & s'ils ne desobeissent à ses commandemens; Les biens de ce monde que vous possédez vous aggreent, mais les biens du Ciel sont beaucoup meilleurs & sont eternels, ne le connoistrez-vous pas? N'auons-nous pas tenu promesses à ceux à qui nous auons promis le Paradis; & à ceux à qui nous auons promis les biens de ce monde, & qui ont esté à la fin au nombre des damnez? Souuiens-toy du iour que ton Seigneur les appellera, & leur dira, où sont vos Idoles que vous croyez estre mes compagnons? les principaux d'entr'eux diront, Seigneur, voila ceux qui ont esté deuoyez côme nous, nous sommes innocents de leur idolastrie, ils ne nous adoroient pas, On dira ce iour aux Idolastres d'inuoquer leurs Idoles, mais ils ne les exauceront pas, ils seront chastiez visiblement en terre; Souuiens toy du iour que ton Seigneur les appellera, & leur dira, Pourquoi n'auiezvous pas crû mes Apstres & mes Prophetes, ils serôt cõfus & demeureront muets. Celuy qui se conuertira & qui fera de bonnes œuures sera bien-heureux. Ton Seigneur crée ce qu'il veut, & fait election de qui bon luy semble.

Loué soit Dieu il n'a point de compagnon, il sçait ce qui est dans le cœur des hommes, & ce qu'ils mettent en euidence, il est Dieu, il n'y a point de Dieu que luy, Louange luy est deuë au commencement & à la fin, il commande à toute chose, & tout le peuple fera vn iour assemblé deuant luy pour estre iugé, Dis leur, Si Dieu vous auoit donné vne continuelle nuit iusqu'au iour du iugement, Quel Dieu y a il autre que luy qui vous puisse donner la lumiere? Ne m'escoutez-vous pas? Si Dieu vous auoit donné vn iour continnel iusqu'au iour du iugement? Quel Dieu autre que luy vous pourroit donner la nuit pour reposer? Ne considerez-vous pas les biens-faits & sa grace? Il a créé la nuit pour reposer & le iour pour trauailler, peut-estre que vous l'en remercierez. Souuiens-toy du iour que ton Seigneur appellera les infideles & leur dira, où sont vos idoles que vous avez adoré? Nous appellerons vn tesmoin de chaque nation & dirons aux idolatres, Apportez vos argumens qui preuent la pluralité des Dieux, Vous cōnoistrez au iourd'huy vos blasphemes & qu'il n'y a qu'un seul Dieu. Car on estoit des gens de Moïse, il estoit orgueilleux à cause de ses richesses, nous luy auons donné des thresors si grands, que plusieurs personnes estoient chargées lors qu'ils emportoient les clefs. Souuiens-toy comme les gens luy ont dit, Ne te réjouis pas outre mesure de tes grands biens, Dieu n'ayme pas ceux qui se resiouissent sans raison, Demande luy le Paradis avec tes richesses, n'oublie pas

de faire du bien en ce monde, faits des aumosnes, des facultez que Dieu t'a données, ne luy sois pas desobeissant en terre, il n'ayme pas ceux qui luy desobeissent, ces richesses t'ont esté données par ce que tu as enseigné au peuple l'ancien Testament, Ne sçais-tu pas que Dieu a exterminé plusieurs personnes riches & opulentes aux siècles passez? Qui est plus fort? plus puissant? & plus riche que Dieu? il ne demandera pas aux meschans le nombre de leurs pechez il le sçait tout, il en sçait le compte. Vn iour Caron est forté en public avec toute sa suite, Ceux qui avoient les richesses de ce monde ont dit, Pleut à Dieu que nous eussions autant de bien que Caron, il est heureux? mais les plus sçauants d'entr'eux ont dit, Vous estes malheureux, la grace de Dieu est plus avantageuse à ceux qui croient en sa loy & qui font de bonnes œuures que tous les thresors de Caron, personne ne recevra sa grace que ceux qui luy obeyront & persevereront en l'obeyssance de ses commandemens. Nous avons osté à Caron tous ses thresors, & personne ne l'a pû proteger contre nous, alors ceux qui avoient souhaité ses richesses ont dit, O Miracle! Dieu donne & oste les biens à qui bon lui semble, Si Dieu ne nous eust donné sa grace, nous serions necessiteux; certainement les impies seront malheureux. Je donneray le Paradis à ceux qui n'ayment pas la vanité ny le desordre en terre, & qui auront ma crainte deuant les yeux, qui bien fera bien trouuerra, celui qui fera mal, sera chastié selon ses

demerites. Celui qui t'a enseigné l'Alcoran te fera retourner au lieu que tu desires : Dis aux habitans de ce lieu , que Dieu cognois ceux qui enseignent le droit chemin , & ceux qui se deuoyent ; Tu n'attendois pas l'Alcoran , c'est vne grace speciale de ton Seigneur, ne donne point de secours aux infideles , & prends garde qu'ils ne le deuoyent apres auoir compris ce que ie t'ai enseigné, Presche au peuple l'vnité de Dieu , Ne sois pas au nombre de ceux qui croient plusieurs Deitez , n'adore que Dieu seul, il n'ya point de Dieu que lui , toute chose prendra fin excepté sa face, Il commande à toute chose, & tous les hommes seront vn iour assemblez deuant lui pour estre iugez.

*C'est la
Me que,
Voy Ge-
laldin.*

*LE CHAPITRE DE L'ARAGNEE,
contenant soixante-neuf versets,
escrit à la Meque.*

AV Nom de Dieu clement & misericordieux. Je suis Dieu tres-sage. Les hōmes ont crû qu'il suffit de dire, nous croyons en Dieu, & qu'ils ne seroient pas espreuez : certainement Dieu a espreué ceux qui les ont precedez, il a connu ceux qui estoient zelez en sa loy, & ceux qui estoient infidelles. Ceux qui ont mal fait croient-ils éuiter la punition de leur crime & n'estre pas iugez? Ceux